



Aqqalu C. Jerimiassen

UKA 2022/7

Atassut

11. november 2022

2023-imut aningaasanut inatsisissatut siunnersuut

(Aningaasaqarnermut Naligiisitaanermullu Naalakkersuisoq)

2023-imut nunatta aningaasaqarnera pillugu inatsisissami isumaqatiginninniarnert suli ingerlarsorput, tamannalu pillugu Atassummiit maanna killiffiusoq iluarisimaarlugu oqarsinnaavugut.

Maannalu aappassaaneerinninnermi ataatsimiitsitaliami suli ”kumaarinnineq” tekniskiunerusoq ingerlagallartoq malunnarpoq.

Maanna partiit suli isumaqatiginninniarlutik ingerlaneranni assiliaq ilivitsoq pinngunngilaq, suut qanorlu ilusilerlugit inernilerneqarnissaat naammassivinnani.

Uagut Atassummiit innersuussutigisimasagut suli isumaqatiginninniaqqinnissamut tullermut anngunnissai pingaartuutinneruarput, maanna inersuarmi aappassaaneerinninnermi nipituuliutigivallaanngikkaluarlugit.

Taamaattumik Aningaasaqarnermut akileraartarnermullu ataatsimiitsitaliaq, taamatuttaarlu Aningaasaqarnermut Naligiisitaanermullu Naalakkersuisoq qutsavigiumavarput suliat killiffiisa saqqummiunnerannut.

Taanngitsoorusunngilarpullu, aningaasanut inatsisissatut siunnersuut saqqummiunneqaqqaarmat uparuarsimasarput, tassalu amingartooruteqarfiusumik inissinnissaq. Tamannalu maanna aaqqinneqarsimasutut isikkoqarmat neriulluarfigisinnaanerulerlugu inatsisissaq Atassummiit naqissuserumavarput.

Covid-19-ip ajornartorsiortitsineri qaangersorilerniarlugit, ajoraluartumik Russit Ukrainemut sorsulernerisa kinguneranik, unammilligassat nutaat kissaatiginanngikkaluaqisut takkuppet. Tamannalu qanorluunniit ilioraluarutta maani qiningaasugut, nunarsuaq tamakkerlugu akit qaffariaateqartussaanerit imaaliinnarluta iliuuseqarfigisinnaanissaa oqitsuinnaasinnaanngilaq.

Takinerusumik oqaaseqarata, siunnersuut pingajussaaneerneqartingani Aningaasaqarnermut Akileraartarnermullu ataatsimiitsitaliamuqaqqinnissaa Atassummiit innersuupparput.